



民國佛教期刊文獻集成

任繼愈題



補編



B94
223
:6

民國佛教期刊文獻集成補編

任繼愈題

第 6 卷



蘇城隱貧會旬刊匯編

中國書店

蘇城隱貧會旬刊彙編序

蘇城隱貧會

旬刊彙編



寄售處蘇州開門西街三十七號曹第內

一聖學是書係覽經老人闡發四書精義朱注以外取自漢迄今諸儒說經之深切著明者以次編錄又復折衷至當加以案語以達古聖人微旨

蘇城隱貧會旬刊彙編

第一期

蘇城隱貧會旬刊彙編序

古今勸善之書多矣。皆所以正人心扶世道者也。然或主於勉善。或主於警惡。或主於迪哲。或主於醒愚。所遭之時不同。其言遂因之而異。欲求按時勢以立言。示當務之爲急。提倡正學。以挽救頹風。指示迷途。而開陳大路。勉善警惡。同抒剴切之辭。迪哲醒愚。盡入陶鎔之內。使人心可化。世道可興。劫運可潛消默挽。本善與人同之旨。以收同歸於善之功。爲勸善書之集大成者。則惟隱貧會之旬刊是已。是刊也。創於乙丑荷夏。以旬爲期。迄今已更一載矣。每一刊出。四方風行。先睹爲快。惟積累既多。恐易散失。不克傳之久遠。凡古人著書既多。必疊成卷軸。旣便翻閱。復易收藏。故今復取期年所刊。分類編次。彙成一卷。共分八類。

一聖學 是書係復禮老人闡發四書精蘊。就朱注以外。取自漢迄今諸儒說經之深切著明者。以次編錄。又復折衷至當。加以案語。以達古聖人微言。

大義性與天道。其有關於今日之風俗人心者。尤剴切敷陳。推闡盡致。以仁天下。垂教將來。讀之可以檢束身心。通達治體。轉狂爲聖。一以貫之矣。

一鸞訓 古聖人以神道設教而天下服。厥後飛鸞顯化。事雖異而理實同也。今濟祖主持江浙鸞壇。偕三教聖人隨時降筆。皆精理名言。深入顯出。所以扶植名教綱常。箴砭頹風薄俗。是編卽錄華雲壇訓。兼及他處鸞訓之足以救世道人心者。非尋常勸善諷世之文。實有益於身心性命之學。

一格言 古今格言。以廣大精微之理。發簡淨顯白之辭。便於誦習。益於身心。是編所輯。尤名人言論之確當者。端木子所謂一言而可以終身行之。孟子所謂言近指遠之善言。守約施博之善道。誠能誦習。則立言立行。有所遵循。

一詩文雜俎 詩三百。其用歸於無邪。文體多矣。其要歸於約禮。是編之詩。皆長於諷諭。足以感發善心。懲創逸志者。其文皆正人心。扶世道。揚潛德。發

幽光者。言言金石。字字珠璣。合爲一編。以備淑性陶情之助。

一佛學叢談 當今之世。爲五濁惡中之慈航寶筏者。惟佛學是賴。故舉世風行。咸知崇奉。然欲一超直入。須有準繩可循。若輯叢談。能使閱者易於領悟。免入歧途。

一因果小說 古今因果。爲懲惡勸善之徵。苟能知造因無不得果。庶幾人懼惡果。而勉造善因矣。本刊所取。皆近今確鑿之事。以資左證。

一中醫雜誌 有時令要方。及投稿驗方。急救良方。彙成雜誌。供窮鄉僻壤倉猝無醫者。可以隨症施治。爲卻病壽人之助。

一來稿 來函所採登者。皆於世道人心有益之作。與本刊宗旨不謬。其中名言精理。大有可觀。

統茲八類。衆善皆備。無美不臻。豈非勸善書之集大成者乎。語其精微。則直探乎道之大原。語其淺顯。則窮究夫事之迹象。至於幽明之故。死生之說。人或

爲不可知不可憑者。今皆據事直陳。有徵可信矣。則是編之行。上之可以爲經
儒文師通人碩士考道論德之資。次之可以爲農工商賈略通字義者修身齊
家之助。他若爲童年初學講授提命。俾習聞乎善言。以感發其善氣。則蒙養乃
作聖之基。是宜家置一編。隨時誦習。庶幾日就月將。學與德皆當與年俱進。而
見智見仁。深造不難自得。希賢希聖。由淺可以入深焉。而茲所更有望者。天道
運行而不已。善機迭引而愈長。年復一年。刊益加刊。則由一編以至十百千萬
編。蔚爲天地間之大文。可以操元會運世之木鐸也矣。是編特善端之發軔云
爾。

吳縣金 俊撰

爲不可知不可憑者。今皆據事直陳。有微可信矣。爾後學者。上之可
儒文。雖入顯士。考道論德之資。次之可以爲農工。雖入顯士。考
家之助。他若爲童年初學。講授提命。俾習聞乎善言。以善言。則家養乃
作聖之基。是宜家置一編。隨時誦習。庶幾日就月將。學與德俱進。而
見智見仁。深造不難自得。希賢希聖。由淺可以入深。而爲學。入道
運行而不已。善哉。此書。年復一年。如一日。一編。是編。特善端之發
編。爲天地間之大公。元會運世。是編。特善端之發
附。

吳縣金 後撰

聖學

聖學挽狂錄序

(復禮老人曹元弼稿)

嗚呼。世禍之烈。人心之狂。至今日而極矣。十餘年來。反易天常。殫殘聖法。智者詐愚。勇者威怯。强者陵弱。衆者暴寡。民不聊生。戰無虛歲。浩劫彌天。殺機遍地。原野厭人之肉。川谷流人之血。寡人之妻。孤人之子。獨人父母。老窮廢疾。轉死溝壑。貞烈婦女。慘遭鋒刃。婉孌幼弱。方生被殺。烽火蹂躪。甚者數百里無人煙。其次城邑殘破。死亡枕藉。其最輕者。亦顛沛流離。辛苦墊隘。無所控告。士則十儒九丐。農則苛斂無藝。商則竭澤而漁。工則失業待斃。兵則積血暴骨。非殺人卽爲人所殺。窮民迫於飢寒。强者爲盜爲匪。弱者投繯飲藥以死。四海之內。凡我兄弟之顛連而無告者。其疾痛慘怛之狀。雖木偶鐵人。猶將下淚。仁人君子。蒿目傷心。流涕嗚咽。直泣盡而繼之以血。嗚呼。人之生也難矣。造物之不仁甚矣。雖然。下民之孽。匪降自天。乾吾父也。坤吾母也。天地之大德曰生。夫豈忍殺其所生哉。人心之狂。自作孽耳。人皆有

不忍人之心。無惻隱之心。非人。無羞惡辭讓是非之心。非人。人皆可以爲堯舜。豈一旦而盡甘爲羿浞莽卓巢溫闖獻洪楊。賊人以自賊哉。學術之謬。驅而納諸罟擗陷阱之中耳。天下之禍。莫大於學術人心之害。而洪水夷狄猛獸次之。何則。洪水滔天。抑之則止。烈火燎原。撲之則滅。蠻夷猾夏。寇賊姦宄。綏而靖之則平。禽獸逼人。驅之則已。惟邪說暴行。陷溺人心。流毒天下。釀成劫運。則將有不可禦之水火。無窮已之兵革。猛虎長蛇。人立而搏噬。其勢必使橫目之民。無噍類而後已。孟子所謂率獸食人而人將相食。豈不殆哉。是故學術之謬害人。人心之邪造殺運。人情莫不好生而惡殺。蓋亦反其本矣。何謂本。曰。聖學。聖人者。生人者也。聖學者。教天下萬世之人相生而不相殺者也。傳曰。產萬物者聖。聖之言生也。易曰。聖人作而萬物覩。先儒謂聖人有生養之德。萬物有生養之情。聖人先得人心之所同然。盡其性以盡人之性。故能贊天地之化育。而其道與天地參。天不變道亦不變。人由之則生。不由則死。天下由之則治。不由則亂。蓋天降生民。莫不與之以仁義禮智之性。而氣質之稟。或不能齊。雖有善性而不能自覺。天之愛民甚矣。既生之。與以善性而使之相生。又懼其不能自覺而流於相殺。於是篤生聰明睿智能盡其性之聖人。以先覺覺之。而學興焉。夫人之生也。爪

牙不足以供嗜欲。趨走不足以避利害。無毛羽以禦寒暑。非相生相養。則莫能以獨生獨活。非相愛相敬。則不能以相生相養。聖人與天地合德。有生人之大仁。知性之大智。知人之相生。必由於相愛相敬。而相愛相敬之本。出於父母之愛其子。與子之愛敬其父母。故人道自父子始。然必人類有定偶。而後人人知父之爲父。子之爲子。故爲之別男女。定夫婦。類族辨物。氣化不亂。以協乎天地之性。而生生之本立。又必人類有會歸。而後人人得父其父子其子。故爲之立君臣。辨上下。達禮定分。任賢官能。養欲給求。禦災捍患。興仁讓。去爭奪。而生生之道行。有父子。則有昆弟長幼。而恩義篤於家。有君臣。則有朋友。而親遜任信達於天下。三綱立。五倫備。人類大別於禽獸。草昧日進於文明。先王以至德要道順天下。因嚴敬。因親教愛。孝弟忠信率天常。禮義廉恥張國維。人人親其親。長其長。老吾老以及人之老。幼吾幼以及人之幼。合敬同愛。合智同力。備物致用以利天下。天下於是相生相養相保。而可以永不相殺。故人之生生於倫。天地之性人爲貴。貴其異於禽獸也。禽獸無倫。故不能相生。人有倫。故能相生。然禽獸不能相生。亦不至相殺。人而無倫。則其可以相生之聰明才力。必將反而爲相殺。故人之生生於倫。聖人。人倫之至也。聖學。所以明人倫也。自開闢以來。三皇五帝

禹湯文武周公孔子。平成天地。奠安羣生。垂教萬世。皆同此道。易詩書禮樂春秋。廣大精微。蟠天際地。皆同此義。是謂聖學。由周公而上。聖人皆得位而治民。故天下長治不亂。雖亂易治。學術不歧。人心不惑。及周之衰。亂臣賊子作。學非而博言僞而辯之徒。騰邪說以飾暴行。要君無上。非聖無法。非孝無親。惑世誣民。忍心害理。將啓戰國楊墨暴秦坑焚倒懸糜爛之禍。孔子以生民以來未有之大聖。兼包古先聖王愛敬生養天下之盛德至道。論撰易詩書禮樂。制作春秋。示後聖繼天立極興致太平之大經大法。作孝經以立天下之大本。與弟子講學。法言德行著在論語。二十篇中無一語非覺世牖民悲天憫人之仁。視禹稷已溺已飢伊尹匹夫不獲若推溝中。其怵惕惻隱蓋又過之。曾子櫟括其道以爲大學。誠正修齊治平一以貫之。聖學綱要昭然著明。子思闡其微言。窮極天人之奧。而歸於子臣弟友庸德庸言。孟子稱仁義絕利端。以救民水火。道性善。息邪說。正人心。而聖道益彰。嗚呼。春秋戰國之變。爲天地剖判以來所未有。聖王不作。亂賊橫行。爭地以戰。殺人盈野。爭城以戰。殺人盈城。暴秦焚書坑儒。以愚黔首。殺戮無辜。視民如魚肉。兵禍之慘。斬首百萬。刑罰之酷。動夷三族。賦稅之重。收至太半。徭役之煩。騷徧海內。天地生機。嗚呼盡矣。藉非孔子刪述六藝教授弟子。

昌明大道於前。曾思孟子翼贊至教於後。則先王政教。既已絕滅。務以詐力相吞噬。人類幾何而不滅。自漢以來。又何所取法以重活我民。使縣縣延延。以至今日哉。故先聖垂典文褒勵學者之功。直如天地之大生廣生。無不覆幬。無不持載。萬世之下。我民之得以生殖長育。皆賴孔子愛敬生養之仁。聖學之明晦。世運隆替。天下生民休戚之本。歷觀漢魏以來二千餘年。治亂之迹。昭昭可睹。今也昊天不弔。世衰道微。邪說暴行。又作。學風之惡。排棄聖經。俶擾天秩。裂冠毀冕。拔本塞源。敗綱斁倫。誨盜誨淫。絕天地之生理。而相率以陷於必死之域。彼方侈然藉口於西學。而不知聲光化電。西學也。邪說暴行。非西學也。使西人而如此。則其國久已滅矣。其人久已相殺殆盡矣。尙安有富强之業哉。此心此理。中外皆同。余往時每與西人言及六經大義五倫至教。無不翕然稱善。以爲心安理得。我中國爲普天大地中文明首出之區。數萬萬人民。何莫非神明之裔胄。禮教所涵濡。今一旦悖亂如是。夫豈其性惡哉。遭罹厄會。誤入歧途。如中狂風。遇狂疾。飲狂藥。踏河掬火而不自知。決水縱火而不知忌。實其人之大不幸。而天下蒼生並受其禍。悲夫痛夫。自古邪說橫行。人心病狂。莫如春秋戰國之際。生民受禍。亦莫酷於此時。以戰國策史記考之。六國秦項之禍。天下之民。死亡不啻太

半。今人心之狂。遠過於當時。殺人利器。亦遠過於當時。由今之道。無變今之俗。胥天下而冒上無等。賊人自利。殺機深中於人心。殺氣橫流於四海。周餘黎民。尙復有子遺乎。雖天地生人。聖賢正學。必無中絕之時。消於此則長於彼。西人在吾蘇所立學堂。皆讀四書。勤講授。見近日怪誕之新字。陋劣之白話。皆深鄙之。嘗謂中國他日欲得能講授四書五經之師。當反於吾西人求之。其言絕痛。默觀盈虛消息之理。必有環球大同。聖教徧行五大洲之一日。所謂凡有血氣。莫不尊親。然旋轉反覆之間。必先有殺人如麻。玉石俱焚之禍。皆人心之狂鬱積而成。言之不寒而慄。天之愛民甚矣。人而自絕於天。天雖欲愛之而不能。則勢必禽獮而草薶之。是大可懼也。今觀殺機日急。萬萬生靈。皆將有利兵在頸。烈火燃眉之痛。每誦夫子之言。吾非斯人之徒。與而誰與。仰天揮淚。不能自己。不勝區區愚誠。愛敬吾顛連之兄弟。欲以仲尼元氣。顏子春生。消宇宙之患氣。挽殺運而與之並生並育。相生相養相保。謹將四子書。依據朱子章句集注之義。博采羣言。兼下己意。屬中表弟金智詮明經第而錄之。務使一覽而悟。感人易入。庶幾聖學明而人心正。人心正而殺運弭。障百川而東之。挽狂瀾於既倒。使天下皆明倫理。敦仁讓。夫安有悖逆詐僞爭奪相殺之禍哉。人情不甚相遠。惟狂克念作

聖。一轉念間。逆子皆可以爲孝。亂臣皆可以爲忠。暴民皆可以爲仁。亂世皆可以爲治。我欲仁。斯仁至矣。詩曰。天之方蹶。無然泄泄。我人類之禍急矣。轉禍爲福。起死回生。及今或猶可以挽也。方今仁人君子所當急爲者。一曰救人命。一曰正人心。蘇城隱貧會。濟失職貧士。哀矜鰥寡。殫心竭力。實事求是。今欲發行旬刊。以正人心。首講明四書大義。名曰聖學挽狂錄。無窮悲憫。發爲苦言。惟冀蒙以養正。善氣致祥。人心向道。天心悔禍。兵氣消爲日月之光。劍戟鑄爲耕農之器。民用和睦。上下無怨。災害不生。禍亂不作。一息尙存。日夜望之。敬書所見爲之序。卽以爲旬刊發首通告。

聖學挽狂錄條例

一學術邪正。辯之不可不早。易曰。蒙以養正。聖功也。童子天性未漓。教以聖賢正道。使少而習。長而安。不見異物而遷。則善氣充積。蘊之爲德行。行之爲事業。天下蒼生並受其福。近十餘年來。廢聖經不讀。自少習聞悖禮亂常之說。是蒙以養邪。將胥天下而爲狂也。哀我子弟。生氣方長。而遽引之入於殺機。謬種滋蔓。四海勢必徧遭殺劫。今大禍日迫。人情創鉅痛深。漸知悔悟。迎機利導。正本清源。反狂爲聖。必自養正於蒙始。孝經四書。庸德庸言。